

**Kalaallit Nunatsinni innuttaasut amerlanerit kalaallisut oqalussinnaalernissaannik periusissiatut iliuusissanut pilersaarummik kingusinnerpaamik Inatsisartut 2014-mi upernaakkut ataatsimiinneranni saqqummiunneqartussamut Naalakkersuisut suliaqaqqullugit Inatsisartut aalajangiiffigisassaattut siunnersuut.**

(Inatsisartunut ilaasorta q Mimi Karlsen, Inuit Ataqtigiit)

**Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

**Siullermeerinnineq**

Kalaallit Nunatsinni innuttaasut amerlanerit kalaallisut oqalussinnaalernissaannik periusissiatut iliuusissanut pilersaarummik kingusinnerpaamik Inatsisartut 2014-imi upernaakkut ataatsimiinneranni saqqummiunneqartussamut Naalakkersuisut suliaqaqqullugit Inatsisartut aalajangiiffigisassaattut siunnersuummik siunnersuuteqartup saqqummiussineranut Naalakkersuisut sinnerlugit qutsavigaara.

Siunnersuuteqartup nassuiarpaa kalaallit oqaasii Inatsisartut inatsisaanni nr. 7, 19. maj 2010-mi § 3 naapertorlugu pisortatigoortumik oqaasiusut, taamaalillunilu allaffissornermi aamma oqaasiullutik. Siunnersuuteqartup erseqqissarpaa Kalaallit Nunaanni innuttaasut amerlanerit kalaallisut oqaaseqartuusut aammalu kalaaleqartoq nuuttoqarnikuullunilu kalaallisut oqaaseqanngitsunik.

Siunnersuuteqartup piumasaaqatigaa inersimasut kalaallisut ilinniarnissamik kissaateqartut ilikkagaqartarnerannut Naalakkersuisut iliuusissatut pilersaarusiussasut periusissiorlutillu.

Naalakkersuisut ilisimatitsissutigisinnaavaat Oqaatsinik Pikkorissarfiup Sisimiuniittup kalaallit oqaasiinik pikkorissarnernik pilersaarusiornissaq ingerlatsinissarlu ilaatigut suliaassarigaa. Ukiumi pikkorissarfiusumi 2012/13-imi (august 2012-imiit juli 2013-imut) kalaallit oqaasiinik pikkorissarnerit katillugit 16-it Oqaatsinik Pikkorissarfiup ingerlannikuuai. Inuit katillugit 146-t peqataapput aammalu peqataasut najuutsillugit pikkorissarnerit katillugit qulit ingerlanneqarlutik. Oqaatsinik Pikkorissarfimmit kisitsisit takutippaat kalaallit oqaasiinik pikkorissartarneq soqutigineqartorujussuusoq.

Naalakkersuisut isumaqarput pingaartuusoq inuit tamarnik kalaallit oqaasiinik ilinniarnissamik kissaateqartut periarfissaqassasut. Naalakkersuisut tamassumunnga pisariaqartunik tunngavileerusupput. Kalaallit oqaasiinik ilikkagaqarnissamut siaruaanissamullu periarfissat annertusarnissaat siunertaralugu Naalakkersuisut Oqaatsinik Pikkorissarfik saaffiginiarpaat.

Naalakkersuisut aamma Oqaatsinik Pikkorissarfik tassunga tapiliullugu kalaallit oqaasiinik ilikkagaqartarnerup annertusinissaanut periarfissat pillugit pilersaarummik suliaqassamaarput. Pilersaarut nassuiaammi suliarineqassaaq. Ilimagineqarpoq nassuiaat iliuusissatut pilersaarutivimmuut periusissiavimmullu aallaavittut atorneqassasoq. Taamaalilluni

ilimagineqanngilaq nassuiaat aalajangiinissamut siunnersuummi oqaatigineqartutut iliuusissatut pilersaarutivittut isikkulerneqassasoq.

Taamaammat siunnersuut taamatut isikkoqartillugu Naalakkersuisut ilalersinnaanngilaat.